

Yémísi

Ísu wíyómpa'a iyówana Yémísi Ísun-áfáko éna Yérúsaremu'fala ména Fasi'aénkóní waásiya'a káráwiyaiwai moórá-waai-aataiya'iyó miyáumai-aatai maisuwéna maanáái agaimái Yúndaa-waasi Ísuni aampa'ó kuwái agaimái mátímakaiye.

¹ Kemá Yémísi maanáúfái agaimái timúne. Maníkóní kísauwe Ísu Káraísitini kísauwe maúndawi maanáúfái agai-timúmpo Ísarerin-áánintomba sísamaifakemba kae'á kumbaimái-waasi tisaafitantambo uráawi fi'o-fi'om-barafa'a wété úmaimo méraawi ísáaro.

Fasi'átínkáín-aai.

² Kesí waásisono. Umbai-tántáá'á fi'o-fi'on-tantaa'a kempá'á wétifo tirumbá fetói úmai méraaro.

³ Umbai-tántáá'á kempá'ó timbá Fasi'aénkó Ísuwe kááísamaimo mé'o ímbo auwé'o é'a fasi'ámai ménaawe. Mindásafe'a ísaraamba póna umbai-tántáá'á kempá'á wétifo tirumbá fetói úmai méraaro.

⁴ Fasi'ámai maé'mae'a úmae'a iyíyana ímba tuwesarái ína'a miyán-káwé'-ímáyáá úmae iyíyana Maníkóní kawé-tántáátáféna ímba táái táíniye.

⁵ Kawé'-ímáyáá maénae síyawi Maníkómpá'ó áísai íyanamo éna timíníye. Maníkó nóintafera sísai-oo ímbo sínda ímba ta'ótorainifo úwoi timíníye.

⁶ Maníkómpá'ó áísai íyamba ímba kae'-ímáyáá é'a úwoi kesáái isáíniye seró. Kaumbo-kae'-ímáyáámó tokáiyawimo ésa kafóná-waasi pósa afufumpin-kwáásí mésa kowaétuwe tawaétuwe-waasiyaamban-owe.

⁷⁻⁸ Miyámó owí kaumbo-kae'-ímáyáá ésa ímba mimbórá-ímáyáá úmai arááiwaesa kawe-kísáú wémaefo sáwí-imayaa arááiwaesa miyámó owí Maníkómpá'ó áísai

íyan-tantaa'a simíníye-imayaan-oyo.

Óntaiyain-kwaasiye óntawara'-waasi-taai.

⁹ Óntaiyain-kwaasi Ísu Káráisitín-aaisafesa érai'emo sewanamó ímbá Maníkó séna kesí waásín-owe simbánifo tirunkó kawe'a wéifo

¹⁰ óntawara'-waasi Ísu Káráisitín-aaisafesa érai'emo sewanamó ímbá Maníkó séna kentí óntama ímba aifaráán-tántáá'án-íye simbánifo miwíwará'á tirunkó kawe'a wéíye. Kawe-tántáá'ó mowáán-arambo wénamo aáémbo kaintembá óntama aifaráán-tántáá'á iyé-ímáyáámó on-kwáásí miyaráán-úmai tai'ánááwe.

¹¹ Aafáúmá íyáúsena aa'á kaisaná mowáán-arambo aáénkénamo minkáwé-tántáá'ó aáénkaambo kaintembá óntama aifaráán-tántáá'á iyé-ímáyáámo on-kwáásí kisaumo máemba miyaráán-úmai tai'ánááwe.

Sáwí-imayaamo kempá'ó tína'a a'áo seró-áái.

¹² Ísu Káráisitín-aaisafesamo érai'emo sewanamó ímbá miwífá sáwí-tantaa'o tındamo ésa a'áomo síyanamo éna tirunkó kawe'a íniye. Miyáumai fasi'ámaimo maé'mae'o íyanamo éna Maníkó timénaumne siyáin-tantaa'a timíníye.

Ááéma Maníkó séna tirumbó símén-kwaasi aúí'a úmai maé'mae'a ónááwe siyáintemba miyá uwátinkainiye.

¹³ Sáwí'o

í-tántáá'ó kentópa'o tína'a sáwí'a ónaumne-imayaamo é'o é'a Maníkóntáfé'a sáwí-imayaa símakaiye sefó. Maníkó ímba sáwí'a í-ímáyáá tiména ímba wení imáyáafinkemba sáwí-imayaa tafisímai mémairainiye.

¹⁴ Kentáá sáwí-imayaasafena sinkáínda misáwí-ímáyáágó kentáá tafisínata arááiwaénanasa

¹⁵ misáwí-ímáyáágó ta'ótorainata sáwíta ónaumne. Sáwítaamo úmae iyónanasaamo éna misáwí-ímáyáágó anondáá méraundawini áwáuma Maníkóní némpata méranaumne. Mindásafe'a Maníkóntáfé'a sáwí-imayaa símiye sénááfo imáyáa úmai kawel'án-oro.

¹⁶ Kesí waásisono. Mindásafe'a karo'-ááísáfé'a érai'e sefónifo kawel'-úmai ísáaro.

¹⁷ Seyaafá'á érai-tantaa kawel'-tántáá'á kentááfátá kentáásifowama Maníkónópakemba wégumiye. Aafáúwé wíyóne o'é úmakowana aafáúmá kúwáfekena siyaréna wéifo Maníkó ímba miyá wéifo aasiyaasí sama kásinkena ímba fí'o-fi'on-imayaa wéiye.

¹⁸ Maníkó wení imáyáa arááiwaena érai'-aai simásimenasa minéráí'-ááísáféna aú-waasiyaanta uwásínkáísata aifa'á wení waási-ita uráanasasa ánaaemba fí'o-fi'on-kwaasi miyá ónááwe.

Maníkón-aai isésa miyámó on-áái.

19 Kesí waási ken-ímáyáámó únda-waasi isáaro. Maníkón-aaí isámai kawel'a é'a imáyáa uré'a aaí sé'a ímba ááéma aaisambá seró.

20 Aaisambó sen-ámbá Maníkóní kawel'-ámpá'á ímba aaisambá sen-ámbán-íye.

21 Mindásafe'a sáwí-imayaawe sáwí'o on-tántáá'é watuwé'a kumé'a Maníkón-aaí tirumpimbó makáan-aaí isámai kawel'-íyana minááígó kawel'-ámpá'á métinkainiye.

22 Maníkón-aaí táá'-aantembo isé'o Maníkón-aaí isáúnda é'a isáúmne sé'o é'a kesáfé'a karo'á sefó Maníkón-aaí ímba táá'-aantemba isé'a wemó siyáintemba oro.

23 Maníkón-aaí isésa wemó siyáintemba ímbo íyawi

24 nonkwaaúmpimbá tóí'a awánasuwesa kówasa miyámó ombá ááéma wétuwinkawimba miyámó owí Maníkón-aaí isésa wemó siyáintemba miyá ímba wéowe.

25 Maníkón-aaí sásá'-ááígó póna minááígó sáwí-imayaagomo ta'ótokaimpinkemba faútinkainiye. Maníkón-aaí isésa wemó siyáintembo íyawi isésa ímba tuwinkáínda miyá úmaesa iyíyana minááígó tirumpimbá kawel'a uwátinkainiye.

26 Nom-báí-wáásí úne sembánifo sen-ááíyá'ó ímbo káráwiyombo ésa kentí imáyáagomba karo'á simásuwesa tóikaken-aantemba sésa nom-báí-wáásí úne wésewe.

27 Keto'-ínínká'é áwíyaraa'-iyampoíya'e umbai-tántáá'ó wérawaiya'e káráwiyesa marapá'-wáásítí sáwí-ampa'a tínaaemba uwásúwááwi Maníkón-aaí isámai kawel'a ésa Maníkó

kentáásifowan-aúranka'a érai'-nom-bai-waasi
mésa Manikón-aráái aantemba wéwaewe.

2

Mimbórá-ímáyáán-oro-aaí.

¹ Kesí waásisono. Fasi'aénkó Ísu Káraísiti
fí'loran-aaí wéráiwaini aaisáfé'a érai'e sé'a
wenká'á timankúnkúmba ofo túwí'o wérainda-
waasi kawé'á uwátinke'a túwí'o ímbo wérainda-
waasi tínaaemba uwátímémba mindá sáwí'a ofo

²⁻³ káráwiyoro. Túwaandu ompímbo
moóráwigomo óntawara'-waasigo éna kawé'-
únánkwátói úmaena tisanamó óntaiyain-kwaasigo
éna sáwí-unankwatoi úmaena tisa'ó kawé'-
únánkwátóiwarawintafe'a simándára'a tamauwó
sé'ó sáwí-unankwatoiwarawintafe'ó nénka'a
tamauwómó sembá mindá sáwí'a wéowe.

⁴ Miyámó sembá kempínkémbá tuwímbai túma
maimaé'a iyé'a tuwímbai símai sáwí'a é'a sáwí-
imayaasamba tuwínkaa'a wéowe.

⁵ Kesí waási ken-ímáyáámó únda-waasi ísáaro.
Marapá'á méraan-kwaasi óntaiyain-kwaasi
tuwánésa sésa úwoi-waasin-owe sefó Maníkó
óntaiyain-kwaasi wesé'a kááísamai fasi'ámai
méraan-kwaasi tuwánéna séna kesí waásin-owe
wésiye. Ááéma Maníkó séna tirumbó símén-
kwaasi kawáánúndafa'a ménaawe siyáimba

⁶ óntaiyain-kwaasisafena miyá siyáimba pó'a
múra tiyúwáafo. Óntawara'-waasi túma ímba
maimaé'a iyóro. Óntawara'-waasi kembiwí
sáwí'a uwátinkesa aaimá simátinkesa

7 Ísu Káraísitin-awi'a íyáákarain-awi'a kenti óraakon-awi'a símai sáwí'a uwánkáamba pó'a miwí túma maimaé'a íyófo.

8 Maníkón-aai aúfáifimba agaimaréna séna esáfé-ímáyáámó óndantemba fi'owi-imayaawara'a oro

siyáimba pó'a minkáwé'-amáámbó fasi'aén-ámáámbó arááíwae'o é'a kawé'á iyambanifo

9 óntawara'-waasi túmo maimaé iyé'o óntaiyain-kwaasi tiyuwé'o é'a sáwí'a ónááwe. Miyámó é'o é'a kawé'-amáámbá taraisíyana Maníkó aaimá simátinkainiye.

10 Seyaafá'-amáámbó arááíwaesamo moórá-amaambo taraisíyambo éna aaimá simátinkena séna seyaafá'-amáánkómbá taráísówin-owe síníye.

11 Maníkó séna ímba aare-úméné waai-úméné oro séna moórá-aaiwara'a séna ímba waási tínkamiyasa púwóro siyáíye. Ímbo aare-úméné waai-úménémó ombánifo waási tínkamiyasamo puwíyamba áamáamba wétaraisowe.

12 Maníkón-aai sásá'-ááígó póna minááígó sáwí-imayaagomo ta'ótokaimpinkemba faútinkainiye. Maníkó wenáái arááíwáéwiye taráísówiye tuwánéna tísai índa pó'a imáyáa é'a kentóika'e kentúra'e káráwiyoro.

13 Maníkó aafimbá maitinkáíndara'a tirumbó ímbo uwátínkaraawi Maníkó wenarumbá ímba uwátinkainiye. Maníkó aafimbá maitinkáíndara'a tirumbó uwátínkaraawi ímba táá'a ínana Maníkó aruntaféna uwátinkainiye.

Timankúnkúne kawé-kísáúwémó máén-aai.

14 Kesí waásisono. Ísu Káráisitín-aaisafesa timankúnkúmbo ésamo ímbo kawé-kísáúmó maésamo ésa miwí táái úwoi tóikaken-aai wésewe. Mináái tóikaken-aantemba sembá póna Maníkó ímba kawé'-ámpá'á métinkainiye.

15 Maníkóní waásifinkembo moóráwigomo ménamo unáánkwátóiyé tóné ímbo makáindawintafe'o

16 kembiwímó sé'o tómbá nenaná ámú'a fáinama unáánkwátói ane'á márénana koko'á ínama waaó sé'o tóné unáánkwátóiyemo ímbo amé'o é'a kentáái úwoi tóikaken-aai wésewe.

17 Mindásafe'a Ísu Káráisitín-aaisafe'a timankúnkúmbo ombánifo ímbo kawé-kísáúmó máémbo é'a timankúnkúmbo on-áái tóikaken-aantemba sefó tirumpinkémbá ímba wésewe.

18 Tuwímbaimo sésa Maníkón-aaisafe'a simankúnkúmbo únda pó'a Maníkóní waási únemo sewasamó tuwímbaimo sésa kawé-kísáúmó maúnda pó'a Maníkóní waási únemo sembá kemá Yémisi sune. Maníkón-aaisafe'a timankúnkúmbo ombánifo kawé-kísáú ímba máémbo pó'a Maníkóní waásiya'o ímba tuwánáúmne. Kemá kawé-kísáúmó maúnda suwáné sé'a Maníkón-aaisafe'a amankúnkúmbo óne sénááwe kemá Yémisi sune.

19 Maníkó kímborawigo méraiye sé'o érai'emo sembá kawé'-áái sembánifo miyá aantemba sembánifo Maníkó kawé'-ámpá'á ímba métinkainiye. Waántáwankoni kísau-waasiwara'o miyámó sembá kantúmbo matuwésa sembá póna Maníkó ímba kawé'-ámpá'á métinkainiye.

20 Ímba kawé'-ímáyááwára'-wáásín-owe. Ísun-

aaisafe'a timankúnkúmbo ombá ímba kawe-kísáúmó máémba úwoi-aaiyaamba sembá pó'a miwání áwáumo simátíménda ísáaro.

²¹ Naaófá'á kentáa síwá'náma Émbaramu Maníkó simámakaintembo índasafena ááninkon-awi'a Áísáakimba óntan-taarera'a mósá ánkarena tufínena úwana Maníkó séna a'áo siyáíye. Émbaramu miyá uráintafena Maníkó séna arupíse úmai méraane siyáíye.

²² Émbaramu Maníkón-aaisafena érai'e séna amankúnkúmbe éna ímba miyá aantemba uráifo simámakaintemba uráimba Maníkón-aaisafena fasi'ámai érai'e siyáimba é'a ísaraawe.

²³ Maníkón-aai aúfáífimba agaimaréna séna Émbaramu Maníkón-aaisafena érai'e séna amankúnkúmbe úntafena Maníkó séna arupíse úmai méraanemo siyáimba minááígóní áwáuma Émbaramu Áísáakimba tufuwíndasafena uráinka'a afora'á paápé uráíye. Ánaaemba Émbaramuntafesa sésa Maníkóní waásin-íye siyáawe.

²⁴ Maníkón-aaisafesa érai'e sésa timankúnkúmbe ésa kawe-kísáú wémaewisafena Maníkó séna arupíse úmai méraawe sífó Maníkón-aaisafesa timankúnkúmbe ésa ímba kawe-kísáú wémaewisafena arupíse úmai méraawe Maníkó ímba síníye. Mináái káfé'a wéisaawe.

²⁵ Maníkón-aai aúfáífimba naaófá'á agaimaréna moórá-ininko aankaró'-ánká'ó nún-ininkon-awi'a Ré'api fí'onkaa-ininkon-aai siyáíye. Yósúwa

maramá aúpá'á koawánaakaiyo séna ti'marówasarai minínínkóní naaúmpa'a tuyaná mindárai-taai iséna érai'e séna wenamáára

tínkamofó séné moórá-aamba aráátimuwasarai kuráaye. Minínínkó miyá úntafena Maníkó séné arupíse úmai mérain-inimban-iye siyáíye.

²⁶ Timambó kóisasamo waásimo púwóntemba Maníkón-aaisafesa timankúnkúmba ésa ímba kawé-kísáú wémaewi miyaráán-úmai ímba tirunkakémhá timankúnkúmba ofo tóikakemba wésewe.

3

Tóí-kawaan-oro-aai.

¹ Kesí waásisono. Maníkóní kísau uwáítáí'-íyan-kísau ímba sáwífa'nanka maénááfo moórá-morawigo maénááwe. Uwáítáí'-íyan-kísau maúndawisa Maníkó fasi'ámaisa sísaí índarakemba éfo úwoi-waasi miwítí kísausafena aáno úmai tísai íníye. Mindásafe'a ímba sáwífa'nanka sé'a uwáítáí'-íyan-kísau maénae sénááwe.

² Seyaafá'nánkátá tuwímbai-tantaa'a sáwítaamo úndasaawe. Tóí-kawaanesa kawé'-áái-aantembo sewí érai'a kawé'-wáási mésa túra'a seyaafá-tántááká'á kanaa'á wégarawiyowe.

³ Moórá-aai imáyáan-oro. Óraa-poigon-awí'a ósi waási kentí imáyáagomo win-ámpá'ó kónaesamo ombá óipimba ámpáá-fási'áén-taemo'a fáá'ankesa séfasefa'-ayaiya'a ándáma fárí'wimai tiyáámpimba tokésa kentí imáyáagomo win-ámpá'á moórá-aempa'-anda tafisewaná minóráá-póígo wéwiye.

⁴ Nompín-táónkwara'a imáyáan-oro. Mindá óraa-tantaa'a isaná fiyúndágoma famé'mai

fi'opa'a tuwánae isanánifo fafúsúmaenamo nín-tamba ímba óraa-tamban-ifo kári-tamba wemó kónae sipa'á mintámbá waéráísana minóráá'-nómpín-táónko wéwiye.

⁵ Maaráwará'á imáyáan-oro. Waásisa óraa-tantaa'a únanasa sóikoma kári-tantaako sáwífa'-aai séna súsama maimaéna wéiyimba imáyáan-oro.

Aifa'á kári'-iyama karéna kámaena óraa'-amo'na wégauwiye.

⁶ Iyamó kénamo óraa'-amo'namo sáwí'o intembá sáwí-aaigo miyá éna seyaafá súwawaata sáwí'a úmaena wéwiye. Sáwí-aaigoni kisaugo seyaafá'-áémpá'á seyaafá-sáwí-kísáúgómbá wéiyaakaiye. Misáwí-tántáákóní áwáuma waántáwankoma éna kentáásí kísau tasáwí'a éna seyaafá'-áémpá'á wété wéiye.

⁷ Afáá'-wái-wáané numawé iyaankafayaané mófáá'e amí'mí'-úmai káráwiyombanifo

⁸ sáwí-aaigo íyáákarain-tantaa'a pósa waási ímba kanaa'á wégarawiyowe. Waafainkómó waásimo unkútisanamo sáwí'o intembá sáwí-aaigo miyá wéiye.

⁹ Kentáá sááisamba kentáásifowama Fasiáénkón-áwí'a mósá maréta Maníkó weráání'a úmakain-kwaasi símai sáwíta úne.

¹⁰ Mimbórá-sóipínkéntá kawé'-áái séta sáwí'-aai séta wéune. Kesí waásisono. Miyán-ááígó sáwí'a wéiye.

¹¹ Nonaumpinkémbá ímba kawé'-nóné sáwí-none wégumiye.

¹² Inagómá ímba fe'arambá íyáísana kúsigoma kondói-aramba ímba wéiyaiye.

Uwí-nónkó ímba kawe'-nómbá uráínasa waási nánááwe. Mindásafena mimbórá-wáásígómpínkémhá kawe'-ááiyé sáwí-aaiye sisaná miyán-ááígó sáwí'a wéiye.

Kawe'-ímáyáá Maníkómpákémbó kúmín-aaí.

¹³ Kempínkémhá tuwímbai kawe'-ímáyáá torésa ísáán-kwaasi mésa kawe'-ímáyááwárá'-wáási pósa ímba túma maimaé iyésa kawe-kísáú maésa kawe'-úmai méwa'a tuwáné'a sé'a kawe'-ímáyááwárá'-wáásín-owe sefó

¹⁴ kempínkémhá tuwímbaimo miwítí waási tirumbá sáwí'a uwátinkesa sésa óraa'-waasi-i'a ofó sésa keyáá óraa'-waasi-i'a úmai méranaumnemo síyambo ésa miwí túma maimaé iyésa kesáfé'a karo'á sésa kawe'-ímáyááwárá'-wáási úne sefónifo.

¹⁵ Miyán-ímáyáá ímba Maníkómpákémbán-ifo marapákémbá waásiti imáyáa waántáwankoni imáyáafinkemba wésewe.

¹⁶ Tuwímbaimo miwítí waásimo tirumbó sáwí'o uwátinkesamo sésa óraa'-waasi-i'a ofó sésa keyáá óraa'-waasi-i'a úmai méranaumne síyambo ésa ímba moóráfa'a taankarotámai mésa fi'o-fi'on-tantaa'a sáwí'a úmae iyíyamba mindá marapákémbá waásiti imáyáa waántáwankoni imáyáafinkemba ofo

¹⁷ Maníkómpákémbá kawe'-ímáyáámó tokáawi kawe'-aantemba ésa ímba sáwí'wara'a ombá aaweyáá ésa ímba aaisampínkémhá sésa fi'on-kwaasi-taai kawe'-úmai isésa tirumbá uwátinkesa umbaimó máén-kwaasi túwa'nai

esa ímba kaumbo-kae'-áái sésa ímba tuwínkaa'-úmai kawe'á uwátinkesa sáwí'a uwátinkesa ofo seyaafá'á kawe'-aantemba wéuwatinkaawe.

¹⁸ Aáo úmai méranae síyawi aaweyáá uwátinkaiyasa tuwánésa miyáumai aaweyáá úmai méranaawe.

4

Marapá-tántáátáfésa imáyáamo on-áái.

¹ Kempínkémbó aaisambó sé'o áwáá'o sé'o miyámó ombá miwání áwáuma maarán-iyé. Sáwí-tantaakomo tirááímo taintáfé'a imáyáa owaná minímáyáágó ta'ótóráisana aaisambó síyan-aai wépaaliye.

² Tirááímo tain-tántáá'ó makáawa'o ombá tufúwónana puwína'a kemá maénae-imayaa wéowe. Fí'owiti moparáwímbá túraniyamba é'a ímba kanaa'á maíyantafe'a aaisambá tiyé'a áwáá'a wésewe. Tirááímo tain-tántáátáfé'a Maníkómpá'á ímba áísai owaná póna ímba wétimiye.

³ Maníkómpá'ó áísai ombá áísai on-tántáá'á ímba wétimiye. Sirááímo tain-tántáá'á kesáfé'a maénae sé'a Maníkómpá'á áísai ombá misáwí-ímáyáá tokáantafena ímba wétimiye.

⁴ Aaremó waaiyakémbó tiyuwésamo fí'on-kwambo máentemba Maníkómbó aúwáán-kwaasi isáaro. Marapá-tántáá'ó imáyáamo éme'o é'a Maníkóní namuro-wáásíyáámbá ofo mináái imáyáan-oro. Marapá-tántáá'á maénae símae'o iyíyawi Maníkóní namuro-wáásíyáámbán-owe.

⁵ Maníkón-aai aúfáífimba agaimaréna séna

Maníkó séné kesí ámutamba kempímbá maráúnda
sáwí'a ofó sé'a fasi'ámai wégarawiyune
siyáíye

agaimaréna siyáimba mináái ímba úwoi-aain-
ifo

érai'-aain-ifo imáyáan-oro.

⁶ Énifo Maníkón-ímáyáá úndasafenasa súwa'nai
úmaisa wéfasi'asinkaiye. Maníkón-aai aúfáífimba
agaimaréna séné

Maníkó kentúmo maimaé iyówi wéfametiyyuwaifo
wenaísamaifimbo máéwi wétuwa'nai-íye

agaimaréna siyáimba póna Maníkó súwa'nai
úmaisa wéfasi'asinkaiye.

⁷ Mindásafe'a Maníkón-aai isé'a we-
naísamaifimba méraambanifo waántáwankon-
aaisafe'a a'áo siyanamo éna ááéma tiyuwéna
kóína'a

⁸ Maníkóní ewaa'ó méwanamo éna Maníkó
kesé'a mérainiye. Sáwí'o owí kawé'ó úmaimo
méraiyantafe'a imáyáa é'a misáwí-tántáá'á
túwáaro. Maníkón-ímáyááwé mararákén-
ímáyááwémó tokáawi sáwí-imayaa tuwé'a kawé'-
ímáyáán-oro.

⁹ Sáwí'o ontáfé'a ímba aamoí é'a ti'á kaótuwe'a
méraaro. Sáwí'o wéontafe'a ímba wíyááima
iyamba ti'á kaótuwe'a méraaro. Sáwí'o
wéontafe'a tirunkó ímba kawé'á éna sáwí'a ína'a
méraaro.

¹⁰ Fasi'aénkón-aai isé'a wenaísamaifimba
méwana wemá mósá tinkáíníye.

¹¹ Kesí waásisono. Kentí waásisafe'a ímba
sáwí-aai simátínkáaro. Maníkó áamáán-aafimba

séna ímba miyán-oro siyáimba pó'a miyámó ombá Maníkóní áamámba símai sáwí'a uwánke'a sé'a sáwí-amaamban-ye sembá mindá karo'á wésewe. Maníkóní áamáambo tuwínkaa'-uré'o sé'o kári'-amaane óraa'-amaane sé'a minámáámbá ímba kawé'-úmai arááíwae'a wétaraisuwaawe.

¹² Maníkó weyáá áamámba siménasa waási tuwínkaa'-éna kanaa weyáá kawé'-ámpá'á métinkena weyáá waási tai'ásuwainiye. Mindásafe'a waási keyáárika'a ímba tuwínkaa'-ónááfo Maníkóní kisaun-ye.

Ímbo túmo maimaé iyíyan-aai.

¹³ Kembiwí imáyáa é'a sé'a káféra'i aafáyáawa'i óraa'-naopa'a komé'a kísau wémae'a moórá-aatai maisuwé'a sáwífa'-ontamba maénaumne. Miyán-ááímó sewí ísáaro.

¹⁴ Aafáyáara'o ainámbó kárika'o wénamo ááémo turá'wintemba kembiwímó méraamba miyaráán-úmai ááéma tai'ánááwe. Aafáyáa kentópa'o tinda-tantaa'a ímba ísaraawe.

¹⁵ Mindásafe'a sen-áái ímba aneka'ó síyamba maará seró. Fasi'aénkómó ewémó sína'o é'a miyá ónaumpo ímbo ewémó sína'o é'a ímba miyá ónaumne seró.

¹⁶ Miyán-áái sé'a kentí imáyáafinkemba kentúma maimaé iyé'a óraa'-i'a úmai méranaemo sembá miyán-ímáyáá sáwí-imayaan-ye.

¹⁷ Miyáumai ísáaro. Kawé'ó iyawini áwáuma ísámai ífátuwesa miyámó iyamba sáwí'a ónááwe.

5

Óntawara'-waasi-taai.

¹ Óntawara'-waasisono. Senda-áái ísáaro. Kentópa'o umbai-tántáá'ó tinda óraa'-imayaa é'a ti'á kaoré'a méranaawe.

² Sáwífa'-ontama makáamba taúkaa'a isaná sáwífa'-unankwatoi waigo ánáamba kárásuwaisana

³ óntamba makáamba taúkaa'a isasá waási awánésa sésa ímba túwa'nai ombá makáawana taúkawiye siyamba iyamó ane'ó kainten-úmai sáwí-meyamba kentópa'a tíníye. Sáwífa'-ontama makáambanifo Maníkó waásimo méraawini áwáuma tísai índa-kanaa tíníye.

⁴ Kentí kisaumo máén-kwaasiti méyámbá ímba kawé'-úmai tímé'a sáwí'o ombá Maníkó awánaraiye. Minkwáásí óraaka'-oraaka'a sewaná Maníkó fasi'aénkwáráwí wéisiaye.

⁵⁻⁶ Marapá'ó méraanka'a sáwífa'-ontama maré'a kentí imáyáafinkemba kembó tínkáín-kisau wémaewe. Ímbo sáwí'o uráan-kwaasi aaifimbá maitínkówa'a ímba anondáá aái suwa'á tínkamuwasa pukáawe. Póimo tómbó tíméwanamo óraa'a isasamó tufú'naantemba kembó tínkáísa'o miyámó ombá Maníkó sáwí-meyamba tímíníye.

Fasi'ámai mésa inai seró-áái.

⁷ Mindásafe'a fasi'ámai maimaé iyé'a Fasi'aénkó aneka'ó kumínda amu'maráaro. Kísaugoni afowámá kísau úmakena amu'maréna séna kae'-í'a aa'á téna kísau óraa'a ína'a nánae séna amu'maráíntemba

⁸ miyaráán-úmai Fasi'aénkómbá amu'makéwana kumíníye. Fasi'aénkó kárika'a kumínda pó'a fasi'ámai aáno úmai méraaro.

⁹ Maníkó aaifimbá maitínkáínífo kentí waási ímba í'ai tínkáaro. Maníkó aaifimbá maitínkáínda-kanaa kárika'a tíníye.

10 Kesí waásisono. Naaófá'á Maníkón-
aai simátímakowimo uráamba imáyáan-oro.
Fasi'aénkó simátímakon-aai simátíma'mae
iyúwasa ímba ísówana umbai-tántáá'á sáwífa'a
miwífá'á túwasa Maníkón-aai ímba ifátuwesa
fasi'ámaimo mésamo uráantemba miyáumai
méraaro.

11 Naaófá'á Maníkón-imáyáá ésa fasi'ámai
méron-kwaasisafeta séta Maníkó kawé'á
uwátínkarain-kwaasin-owe wésune. Naaófá'á
moórá-waasigon-awí'a Yópuma uráin-aai
imáyáan-oro. Umbai-tántáá'á sáwífa'a wempá'á
túwana Fasi'aénkóntáféna fasi'ámai maé'mae'a
úmaena iyúwana ánaaemba Fasi'aénkó kawé-
tántáá'á ámakaiye. Miyáumai Fasi'aénkó óraa'-
arumba uwásinkenasa
wésuwa'nai-iyé.

12 Kesí waásisono. Óraa'-aai ísáaro. Wíyómpa'o
méráiwain-aúranka'a érai'a súné ímba sé'a
marápá'-wáási túranka'a érai'a súné ímba seró.
Énifo ewémó sé'o é'a úwoi ewé sé'a ímba tiká'á
maré'a seró. A'áomo sé'o é'a úwoi a'áo sé'a ímba
tiká'á maré'a seró. Miyámó síyanamo éna Maníkó
minááisáféna ímba sáwí-meyamba timíníye.

13 Kempínkémbó umbai-tántáá'ó maíyawí
Maníkónká'á inai seró. Kempínkémbó tirunkó
aamoimó índawi imá sésa Maníkón-áwí'a mósá
máráaro.

14 Kempínkémbó tí'o índawi Fasi'aénkóní
waásiti óraa'-waasi táántaiyasa tésa Fasi'aénkóní
fasi'aémbá imáyáa ésa masawémba túra'a
atinkésa inai simátínkáaro.

15 Maníkómó siyáintemba íníye

sésa inai sembá póna Maníkó minkwáási kawel'á uwátinkena iyáfasintinkena minkwáásímó sáwí'o uráiyano éna miwífinkémbá maitiyuwáíniye.

¹⁶ Mindásafe'a kentí waási sáwí'o ombá afora'á símai kufímare'a inai símai túwa'nai oro. Miyámó íyano éna tí'o índamo éna Maníkó asófatin kainiye. Arupíse úmai méraawimo inai sembá Maníkó iséna fasi'ámai wétuwa'nai-iye.

¹⁷ Naaófá'á Maníkón-aai simátímakowin-awi'a Íráiyaa ména wemá kesáámó úndanten-kwaasigo éna Maníkómpá'á fasi'ámai inafínkémbá séna aa'á ímba tíno súwana ímba aa'á téna kaumbo-áátái úmai afa'mórée-wiyomba maisuwówana ímba aa'á túwana

¹⁸ minkákémbá ánaemba inafínkémbá aa'á tíno súwana aa'á túwana kisaufa'a seyaafá-tómbá kawel'á uráiyé. Miyáumai arupíse úmai méraawimo inaimó sembá Maníkó iséna fasi'ámai wétuwa'nai-iye.

¹⁹ Kesí waásisono. Kempínkémbó tuwímbaimo kawel'-ámpá'ó tuwáíya'o é'a métafisiyasamo tésamo kawel'-ámpá'ó tíya'o é'a kawel'á uwátinkanaawe.

²⁰ Sáwí'o uráiyawimo métafisiyasamo sáwí-ampa'o tuwésamo Maníkómpá'ó tíyano éna Maníkó misáwí-tántáá'á sáwífa'a maitiyuwáínsa Maníkóní némpa'o iyamó káíndafa'a ímba kónááwe. Mináái imáyáan-oro.

Kemá Yémisimo súnda-aai taí'áiyé.

Aú-aaí símai kááísamakain-aaí
The New Testament in the Awiyaana language of
Papua New Guinea
Nupela Testamen long tokples Awiyaana

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

PDF generated using Haiola and XeLaTeX on 18 Mar 2025 from source files dated 31 Aug 2023

0dda5aa4-c019-59cf-b9ee-e1fd4762d49c